

NO. SOALAN: 27

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

**DARIPADA : DATO' ABDUL MANAN BIN ISMAIL
[PAYA BESAR]**

TARIKH : 19 NOVEMBER 2015

RUJUKAN : 8271

SOALAN:

Dato' Abdul Manan bin Ismail [Paya Besar] minta MENTERI DALAM NEGERI menyatakan tiada tangkapan awal dilaksanakan terhadap dalang perhimpunan haram BERSIH 4.0 walaupun Polis Diraja Malaysia (PDRM) mengesahkan BERSIH 4.0 adalah pertubuhan tidak berdaftar dan gagal mendapatkan kebenaran daripada Dewan Bandaraya Kuala Lumpur (DBKL).

JAWAPAN:

Tuan Yang di-Pertua,

Pihak Kerajaan tidak pernah menghalang sebarang perhimpunan yang diadakan oleh mana-mana pihak selagi perhimpunan tersebut memenuhi kehendak yang termaktub dalam Akta Perhimpunan Aman 2012 (APA) dan perhimpunan tersebut tidak menjaskan keselamatan persekutuan atau mana-mana bahagiannya atau ketenteraman awam.

Di samping itu, pihak polis tidak membenarkan Perhimpunan BERSIH 4 diadakan atas sebab tidak mematuhi dan memenuhi kehendak Akta berkenaan kerana pihak pengajur enggan memindahkan tempat berhimpun dan bertegas untuk mengadakannya di lokasi yang tidak dibenarkan serta lokasi tersebut tidak mendapat persetujuan daripada pemilik premis atau tempat berkenaan.

Dalam perkara 10 (1) (b), Perlembagaan Persekutuan memperuntukkan bahawa semua warganegara berhak untuk berhimpun secara aman dan tanpa senjata. Namun hak ini tertakluk kepada apa-apa sekatan yang Parlimen dapati perlu atau suai manfaat demi kepentingan keselamatan Persekutuan atau mana-mana bahagiannya atau kententeraman awam, melalui undang-undang yang dibuat oleh Parlimen. Dengan wujudnya Akta Perhimpunan Aman 2012 terdapat beberapa

syarat atau sekatan dikenakan bagi mengelakkan berlakunya kejadian-kejadian yang tidak diingini dan paling penting adalah menjaga keamanan dan ketenteraman awam.

Polis DiRaja Malaysia (PDRM) telah menjalankan siasatan dengan teliti dan rapi bagi mengenalpasti pihak-pihak yang melanggar undang-undang semasa perhimpunan BERSIH 4 pada 29 dan 30 Ogos 2015. Ini adalah bertujuan untuk mendakwa pihak-pihak berkenaan selaras dengan peruntukan Akta Perhimpunan Aman 2012 dan lain-lain peruntukan undang-undang sedia ada.

Bagi Perhimpunan BERSIH 4, pihak polis membuka sebanyak 28 kertas siasatan atas pelbagai kesalahan seperti berikut:-

BIL	KESALAHAN	JUMLAH KES
1	Seksyen 8 Akta Bahan Letupan	2
2	Akta Perhimpunan Aman 2012	15
3	Akta Mesin Cetak dan Penerbitan 1984	4
4	Seksyen 5 (1) Ordinan Hiburan	1
5	Akta Hasutan 1948	1
6	Seksyen 124 (c) – Gangguan Ketenteraman	3
7	Seksyen 506 – Ugutan Jenayah	1
8	Seksyen 353 – Mengeluarkan kata-kata kesat kepada penjawat awam	1
JUMLAH BESAR		28